



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

აფალინა

აფალინა (*Tursiops*), ზღვის ძუძუმწოვართა გვარი დელფინისებრთა ოჯახისა. არქტიკისა და ანტარქტიკის წყლების გარდა, თითქმის ყველგან არის გავრცელებული. გვარში ერთადერთი სახეობაა – ა. (*Tursiops truncatus*, დაცულია 1965-იდან), რ-ის ქვესახეობა – შავი ზღვის ა. (*T. ponticus*) შავი ზღვის საქართვ. სანაპიროებთან არის გავრცელებული. ა-ის სიგრძე 2,5 – 3,9 მ-ს, მასა 300 კგ-ს აღწევს. იკვებება თევზებით (კეფალი, სკაროსი, კამბალა და სხვ.), ცხოვრობს მცირე ჭოგებად, ცურავს 45 – 50 კმ/სთ სიჩქარით, წყლიდან ამოხტომა შეუძლია 5 მ სიმაღლემდე. ჩვენს წყლებში ა. მრავლდება გაზაფხულსა და ზაფხულში. ახალშობილის მასაა 11 – 12 კგ, სიგრძე – 1 მ. სქესობრივ სიმწიფეს აღწევს 5 – 6 წლისა, აკვარიუმში გაზრდილი დედალი პირველად 7 წლისა შობს ნაშიერს. ა-ს აქვს მაღალგანვითარებული ნერვული სისტემა და წვრთნისადმი განსაკუთრებული მიღრეკილება. მსოფლიოს ოკეანარიუმებსა და დელფინარიუმებში (მ. შ. ბათუმის დელფინარიუმში) მათგე ატარებენ ექსპერიმენტებს ექოლოგაციის, ქცევის, ფუნქციონალური მორფოლოგიისა და სხვა საკითხების შესასწავლად. ადამიანის მიმართ მეტად კეთილგანწყობილია.